



Decisiones Sacramentales, Theologicæ, Canonicæ, & Legales

In Quibus Tota materia Sacramentorum, Theologiæ Moralis, Juris Canonici, & Quæstiones plurimæ Juris Civilis explicantur, dilucidantur, & traduntur, Eruditionibus, Historiis, & Exemplis adornatæ ; Opus Episcopis, Vicariis, Parochis, Confessariis, aliisque Studiosis utile, ac jucundum In Libris novem ...

Decisiones Miscellanæ

Chiericato, Giovanni Maria

Augustæ Vindelicorum, 1730

Decisio XXVIII. Argumentum. Referuntur media attrahendi plebem ad audiendum Verbum Dei, & ad discendam in Ecclesia Doctrinam Christianam.

[urn:nbn:de:hbz:466:1-94626](https://nbn-resolving.org/urn:nbn:de:hbz:466:1-94626)

circa bonitatem intrinsecam pecuniæ; & ideo statutum fuit; ut solutio fieret in pecunia nova, ita tamen ut suppleret intrinsecam bonitatem, & qualitatem pecuniæ antiquæ, super qua erat obligatio. *Rebell. d. lib. 11. quæst. 15. num. 4.* unde retorquentur dicti textus, & deserviunt ad favorem Andreæ mutuantis, dum decernitur in eis; servandum esse indemnem ipsum creditorem circa bonitatem intrinsecam, qualitatem, & numerum nummorum sibi debitorum; quod quidem illud idem est, quod petit Andreas: cui si dantur centum Zecchini illius ponderis, bonitatis, & qualitatis, cujus erant illi à se Petro mutuati, contentus omnino erit, sive eorum valor, aut æstimatio extrinseca aucta, sive diminuta sit; & hanc sententiam approbant Bartol. & omnes Jurisperiti in *d. l. Cum quid, & l. Paulus ff. Si cert. petat. ac Covarr. & Canonistæ in d. cap. Cum olim. & cap. Cum Canonice. De censib.* Nam si cuderentur novi Zecchini majoris ponderis, & intrinseci valoris, quam hucusque cusi sunt, Andreas non posset centum repetere à Petro, sed tot quot compensarent pondus illorum centum à se datorum, juxta textum in *d. cap. Cum Canonice. De censib.* Et è contra si novi Zecchini à Principe formarentur minoris ponderis, recipere deberet Andreas majorem numerum, quam centum usque ad debitam compensationem ponderis, & bonitatis ejus centum Zecchinorum juxta *supra cit. cap. Olim.* ut docent Gabriel *com. conclus. de Solut. concl. 1. Rota coram Buratto Decis. 626. sub. num. 3. & lbi Ferentill. in Addit. lit. A. Layman. dict. lib. 3. tract. 3. part. 1. cap. 5. numer. 19. & 26. & Paulus Rubeus in Annor. ad dict. decis. 67. part. 9. recent. num. 12.* ubi testatur, hanc esse communem opinionem, & receptam tam in Scholis, quam in Palatiis.

DECISIO XXVIII.

ARGUMENTUM.

Referuntur media attrahendi plebem ad audiendum Verbum Dei, & ad discendam in Ecclesia Doctrinam Christianam.

SUMMARIUM.

1. Ecclesiam ut Parochiani frequentent, quibus mediis urendum?
2. Rhetorica Ecclesiastica Cardinalis Valerii commendata.
3. Mansuetudo Parochi attrahit plebem.
4. Fiducia in Deum fructuosa.
5. Hercules mystica fabula.

CUM fuisset quæstum quibus mediis Parochi obtraherent, ut populi festinent audire Verbum Dei, Conciones, ac Christianam Doctrinam.

Primò. Alii dixerunt, si illa quatuor Præcepta serventur, quæ notata fuere ad casum Prudentialem in *Decis. XXIIV.* Proximè præterita; videlicet, 1. Quò ad ipsos Parochos. 2. Quò ad materiam. 3. Quo ad Auditores. 4. Quò ad modum loquendi, & prædicandi. Ideò dicta præcepta executioni mandentur ab omnibus animarum Rectioribus, nec non à Concionatoribus libello Rhetoricæ Ecclesiasticæ Eminent. Cardin. Valerii, typis impresso anno 1672. Patavii per Matthæum Cadorinum Bibliopolam, studeatur.

Secundò. Alii, Si Parochus omni die festo non solum prædicaverit, & doctrinam Christianam docuerit, sed populum invitaverit, ut lubens accedat; nam *Bos capitur cornu: Voce ligatur homo:*

Tertiò. Alii; Si mansuetis verbis, comitate, ac charitate utatur Parochus in convocando populo ad imitationem Apostoli, qui aiebat *Philipp. 1. 8. Testis est mihi Deus, quomodo omnes Vos cupiam in Visceribus Christi.*

Quartò. Alii: Si Parochus perseveraverit in docendo, & prædicando, habens fiduciam in Domino; ait enim *S. Bern. in lib. 4. de Consid. Fac tu quod tuum est; nam Deus, quod suum est, curabit. Planta, riga, & tuas implevisti partes: sane ubi voluerit, incrementum dabit Deus. Ubi forte noluerit, tibi deperit nihil.*

Quintò. Alii; Ut constantiam Parochi in prædicando, & docendo necessariam ostenderent, dixerunt, Herculem, constantiæ Typum, ab antiquis figuratum habere catenam in ore, qua ducebat turmam magnam populo- rum in auribus devictorum; unde Alcibiades emblema formavit, & cecinit:

Cedant arma toga, & quamvis durissima corda.

Eloquio pollens ad sua vota trahit.

Sexto. Alii; Si frequenter Parochi declarabunt necessitatem, & utilitatem audiendi Verbum Domini; tum; quia *Quod corpori est cibus, hoc anima est divinorum eloquiorum doctrina. S. Greg. hom. 6. & est signum Prædestinationis; Qui ex Deo est, Verba Dei audit. Joan. 8. 47.* tum etiam quia innumera sunt exempla converforum ad poenitentiam, ob auditum Verbum Domini, ut de David, Nabuchodonosor, Josaphat, Augustino, & aliis.

Septimo. His mediis, propriis quidem, & efficacibus, unum aliud propriissimum, & efficacissimum addidit Curia Episcopalis, videlicet, si Parochum delectabit studium sacrorum librorum, & munus prædicandi, ac docendi populum suum Doctrinam Christianam, & eloquia Divina, juxta illud, *Labor ego super eloquia tua: sicut qui invenit spolia multa. Psal. 118 V. 162.* illumque non pigebit imitari Salvatorem, *Qui erat quotidie docens in Templo. Luc. 19. 47.*

DECISIO XXIX.

ARGUMENTUM.

Declaratur, quinam sint Usurarii manifesti; & duodecim poenæ infliguntur de Jure contra illos.

SUMMARIUM.

1. Pena quam de Jure sint infligenda contra Usurarios?
2. Restitutio quomodo facienda ab Usurariis?
3. Usurarius manifestus qui censetur?
4. Sacramenta deneganda Usurariis publicis: & auditio Missæ.
5. Sepultura Ecclesiastica quando sint incapaces Usurarii?
6. Usurarius an repetat usuras à se aliis solutas?
7. Appellatio non datur à sententia condemnatoria Usurarii.
8. Testamenta Usurariorum non sustinentur.
9. Usurarii expellendi à civitatibus. Et sunt infames.
10. Usurarius non potest fieri clericus.
11. Pena contra Usurarios an incurvantur ipso Jure?
12. Exemplum Usurarii à Deo puniri.

Succ.